

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02 i 13/03), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i čl. 16. i 38. Pravilnika o licencama ("Službeni glasnik BiH", broj 38/05), Državna regulatorna komisija za električnu energiju, na sjednici održanoj 27. decembra 2007. godine, donijela je

ODLUKU

O IZDAVANJU LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. Izdaje se licenca Mješovitom holdingu "Elektroprivreda Republike Srpske" - Matično preduzeće, a.d. Trebinje za obavljanje djelatnosti međunarodne trgovine električnom energijom.
2. Licenca iz tačke 1. ove odluke izdaje se za period od 1. januara 2008. godine do 31. decembra 2012. godine.
3. Sastavni dio licence su Uvjeti za korištenje licence za obavljanje djelatnosti međunarodne trgovine električnom energijom.
4. Ova odluka stupa na snagu danom donošenja i biće objavljena u "Službenom glasniku BiH" i službenim glasilima entiteta.

Obrazloženje

Mješoviti holding "Elektroprivreda Republike Srpske" - Matično preduzeće, a.d. Trebinje (u daljem tekstu: MH ERS) podnijela je Državnoj regulatornoj komisiji za električnu energiju (u daljem tekstu: DERK) zahtjev broj: 03-1409-7/07 od 26. jula 2007. godine za izdavanje licence za obavljanje djelatnosti međunarodne trgovine električnom energijom.

MH ERS je vlasnik početne, odnosno privremene licence za obavljanje djelatnosti međunarodne trgovine, upisane u Registar licenci kod ove Komisije pod registracijskim brojem: 05-28-188-20/05 od 22. decembra 2005. godine, čije trajanje ističe 31. decembra 2007. godine. Shodno članu 38. Pravilnika o licencama ("Službeni glasnik BiH", broj 38/05), ne kasnije od 180 dana prije isteka privremene licence ili od roka koji DERK propiše posebnom odlukom, vlasnik licence je u obavezi podnijeti zahtjev za izdavanje nove licence. O ovom zahtjevu odlučuje se u skladu sa internim pravilima i propisima DERK-a i shodno članu 7. Zakona o prijenosu, regulatoru i operatoru sistema električne enegije u Bosni i Hercegovini ("Službeni glasnik BiH", br. 7/02 i 13/03).

Zahtjev MH ERS je podnjet blagovremeno, na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnijeti uz zahtjev ili predočeni naknadno na zahtjev DERK-a, omogućili DERK-u da razumije, razmotri i odluči o podnijetom zahtjevu. U ovom smislu, u skladu sa članom 8. stav 2. Pravilnika o licencama, DERK je obavijestio podnosioca zahtjeva svojim aktom broj: 05-28-271-2/07 od 19. jula 2007. godine.

Po pregledu i provjeri svih formalnih elemenata zahtjeva DERK je najprije, u skladu sa obavezom iz člana 10. Pravilnika o licencama, 16. augusta 2007. godine objavio u dnevnim novinama i na svojoj internet stranici kratku obavijest za javnost sumirajući zahtjev za licencu i odredio rok do 31. augusta 2007. godine za dostavljanje komentara javnosti na podnijeti zahtjev za izdavanje licence.

DERK konstatuje da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidovalo svoj interes da učestvuje u postupku u svojstvu umješača.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja međunarodnu trgovinu električnom energijom.

Njegove tehničke, pravne i finansijske mogućnosti permanentno su potvrđivane prethodne dvije godine korištenja privremene licence u toku kojih je dokazivao da djelatnost međunarodne trgovine električnom energijom obavlja u skladu sa Zakonom o prijenosu, regulatoru i operateru sistema elektricne energije u BiH, pridržavajući se važećih međunarodnih sporazuma i ugovora čiji je potpisnik BiH, a koji se odnose na međunarodnu trgovinu, poštujući Tržišna pravila i Mrežni kodeks, tehničke i komercijalne standarde, odnoseći se prema učesnicima na tržištu na fer i nediskriminirajući način, neprovodeći bilo kakve antikonekencijske aktivnosti, nezloupotrebljavajući tržišnu moć i nevršeći manipulacije tržištem električne energije, primjenjujući u njegovim transakcijama propisane tarife i uredno plaćajući regulatornu naknadu.

Nadzor svih aspekata usklađenosti djelovanja podnosioca zahtjeva sa uvjetima početne odnosno privremene licence u toku njene primjene, pružio je dokaze DERK-u da može pristupiti pripremi početne verzije Uvjeta za korištenje nove licence za obavljanje djelatnosti međunarodne trgovine koja bi važila pet godina. Ovaj dokument je od 20. septembra 2007. godine učinjen dostupnim podniocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj raspravi obavljenoj 27. septembra 2007. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Nakon što su na raspravi izloženi komentari razmotreni, u skladu sa članom 16. Pravilnika o licencama, pripremljen je prijedlog da se zatražena licenca izda, koji je dostavljen i podnosiocu zahtjeva aktom broj: 05-28-271-10/07 od 9. oktobra 2007. godine. Podnosilac zahtjeva nije koristio pravo da u ostavljenom roku do 17. oktobra 2007. godine DERK-u ponudi svoje konačne komentare.

Pošto je pregledom statusa primjene svih komponenti koje su odlučujuće za dodjelu licence dobio uvjerljive pokazatelje da podnosilac zahtjeva ima osigurane resurse, organizovane uvjete i utvrđene profesionalne standarde da nastavi obavljati istu djelatnost, DERK je odlučio Mješovitom holdingu "Elektroprivreda Republike Srpske" Matično preduzeće, a.d. Trebinje, kao podnosiocu zahtjeva, izdati novu licencu za obavljanje djelatnosti međunarodne trgovine električnom energijom.

U skladu sa članom 9.2 Zakona o prijenosu, regulatoru i operateru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-271-14/07

Predsjedavajući Komisije

27. decembra 2007. godine

Tuzla

Mirsad Salkić